



PROPOSICIÓN PARA INSTALAR PASOS DE PEÓNS INTELIXENTES, QUE INCREMENTEN A SEGURIDADE

O Grupo Municipal do Partido Popular, ao abeiro do Regulamento Orgánico Municipal, presenta, para a súa inclusión no Pleno, a seguinte PROPOSICIÓN:

EXPOSICIÓN DE MOTIVOS

A sucesión de atropelos rexistrados no pasado mes de xaneiro en distintos puntos da cidade volveron a poñer de relevo a necesidade de abordar medidas rápidas e eficaces para tratar de evitar na medida do posible este tipo de accidentes.

Na sesión plenaria do pasado mes de outubro, a través de dúas iniciativas presentadas polos grupos socialista e nacionalista, o Pleno da Corporación aprobou por unanimidade a elaboración dunha planificación para a mellora da seguridade viaria e peonil no conxunto do Concello e, de forma especial, na contorna dos centros de ensino, coa consignación orzamentaria correspondente.

Como complemento desta medida de carácter xeral, o Grupo Municipal do Partido Popular propón unha actuación concreta que consideramos de doada adopción e custo asumible para potenciar a seguridade no contorno dos pasos de peóns. Unha actuación que podería ser aplicable xa en determinados puntos considerados especialmente "sensibles" (por exemplo, aqueles onde se teñan rexistrado accidentes ou cun elevado tránsito), sempre e cando a necesidade e situación deses pasos non se vexa cuestionada por razóns técnicas que aconsellen o seu traslado, como é lóxico.

Trátase de incorporar en determinados pasos, como unha experiencia piloto susceptible de estenderse a outras zonas, unha iluminación intelixente que combine a iluminación cenital con sinalización horizontal e vertical, todo iso con tecnoloxía led de moi baixo mantemento e longa duración.

No ámbito local temos unha experiencia moi semellante que se fraguou a finais do pasado mandato a través dun convenio coa empresa concesionaria do servizo municipal para a Avenida Xoán XXIII, coincidindo coa renovación integral da iluminación desta vía. Dentro desa mellora de prestacións e de eficiencia enerxética, instalouse un sistema de iluminación intelixente en pasos de cebra para reforzar especialmente a seguridade nocturna.

Mediante este sistema, o nivel de iluminación habitual incorpora unha luz a maiores a través dun proxector con sensor presencial que se activa cando as persoas se aproximan para cruzar. Esa maior intensidade de luz mellora tanto as condicións de visibilidade dos peóns como as dos condutores que son advertidos da presenza do viandante.

O mesmo sistema podería aplicarse en varios puntos da cidade onde se ten comprobado un alto risco pola súa situación ou onde existe unha clara deficiencia de iluminación viaria, como no caso do cruce da Avenida Romero Donallo coas rúas Frei Rosendo Salvado e García Prieto. Como suplemento cabería incorporar bandas horizontais e sinais verticais luminosas que avisen da existencia dos pasos de peóns que se activarían tamén mediante sensor presencial.

Estes pasos de peóns intelixentes dotados de tecnoloxía led, evitarían os resaltes na calzada e serían de gran utilidade sobre todo nas noites, pero tamén ao longo do día, ao activar un tipo de sinais de gran visibilidade para as persoas que conducen, combinando a eficacia para a seguridade coa eficiencia enerxética.

En definitiva, consideramos que se trata dunha medida de moi doada aplicación, cun custo de instalación e mantemento perfectamente asumible, e que pode ser moi positiva para, na compañía da mellora das infraestruturas, a planificación da localización dos pasos e unha maior concienciación e precaución de condutores e peóns, incidir nunha drástica redución dos atropelos na cidade.

Por conseguinte, o Grupo Municipal Popular presenta á consideración do Pleno o seguinte

ACORDO

O Pleno insta ao correspondente órgano do Goberno municipal a incorporar, no prazo máis breve posible e como un proxecto piloto en puntos considerados "sensibles", un sistema intelixente para dispoñer un maior fluxo luminoso sobre os pasos de peóns, combinado con bandas horizontais e sinais verticais luminosas que se activen ante a proximidade das persoas para cruzar a rúa.

Santiago de Compostela, a 6 de febreiro de 2017.



Agustín Hernández
Portavoz do Grupo Municipal Popular

- Sr. Alcalde do Concello de Santiago de Compostela